



zenički privredni

2019

BILTEN

SLUŽBE ZA PRIVREDU I UPRAVLJANJE RAZVOJEM GRADA ZENICA I ZENIČKE RAZVOJNE AGENCIJE ZEDA



“Marljivošću, tolerancijom, zajedničkim vrijednostima koje dijelimo i jasnim ciljevima, prevladat ćemo nagomilane probleme i radovati se zajedničkim uspjesima. Sretna i uspješna Nova 2020. godina”

Vaš gradonačelnik, Fuad Kasumović

NEWSLETTER 4

Lokalni razvoj pokreće se i ostvaruje kroz projekte lokalnog razvoja. Zbog toga, lokalna samouprava ima ulogu stvaranja uslova za iniciranje i pokretanje ovakvih projekata i ukupnog razvoja JLS.

U praksi je potvrđeno da se najbolji rezultati postižu ukoliko lokalna samouprava razvoju svoje zajednice (JLS) pristupi kao razvojnom projektu, kojeg

treba osmisлити, pripremiti i voditi u skladu s realnim privrednim, stručnim i tržišnim postulatima i načelima projektnog upravljanja, tako da se njegovom realizacijom uspostave realni uslovi i aktivnosti koji će rezultirati restrukturiranjem nepovoljnog stanja i pokretanjem razvoja.

Grad Zenica kontinuirano nastavlja razvijati Zenicu različ-

itim mehanizmima, pristupima, alatima, sredstvima, načinima i idejama težeći od Zenice napraviti grad koji zadovoljava evropske standarde kako infrastrukturno tako i ambijentalno. U nastavku predstavljamo neke od aktivnosti Službe za privredu i upravljanje razvojem i Agencije ZEDA, realizovane u posljednjem kvartalu 2019. godine.

Grad Zenica će i u budućnosti zajedno sa svojim partnerima nastaviti sa aktivnostima koje u konačnici rezultiraju povoljnim poslovnim ambijentom i ugodnim ambijentom za život, te intencijama da Zenica bude rame uz rame sa modernim evropskim gradovima.

Želimo vam sretnu i uspješnu Novu 2020. godinu

Vaša Gradska uprava



Gradonačelnik Zenice Fuad Kasumović prisustvovao je ceremoniji obilježavanja "830 godina Povelje Kulina bana" koju je organizovalo Udruženje "Forum građana Zenice". Događaju su prisustvovale visoke zvanice iz političkog, javnog i kulturnog života Zenice i Bosne i Hercegovine. U toku ceremonijalnog programa simbolično su otkrivena historijska obilježja replika ploče Velikog sudije Gradješe, te replika Povelje Kulina bana u staklu. Ploča Velikog sudije Gradješe pronađena je u Podbrežju kod Zenice, a predstavlja vezu grada Zenice sa banom Kulinom i tadašnjim uređenjem Bosne. Proglašena je nacionalnim spomenikom BiH. Njenu repliku smještenu u Parku Kulina bana u Zenici, otkrili su gradonačelnik Zenice, Fuad Kasumović i premijer Vlade ZDK, Mirza Ganić. Gradonačelnik Kasumović



CEREMONIJA OBILJEŽAVANJA "830 GODINA POVELJE KULINA BANA"

je čestitao Forumu građana Zenice na organizaciji i realizaciji programa obilježavanja manifestacije "830 godina Povelje Kulina bana". Grad Zenica je jedan od pokrovitelja ove manifestacije. Ceremoniju je obilježio prigodan muzičko-dramski i poet-

ski program, kao i izložba grobova BiH kroz historiju. Dodeljena su i priznanja Foruma građana Zenice za doprinos i afirmaciju Bosne i Hercegovine. Gradonačelnik Fuad Kasumović primio je priznanje "Pozlaćeni medaljon Kulin ban" u ime Grada Zenica.

ODRŽANA EDUKACIJA U SKLOPU PROJEKTA POVRTLARSKE PROIZVODNJE

U Velikoj sali Grada Zenice održana je edukacija za odabrane korisnike po Javnom pozivu za dodjelu platenika od 100 m² sa dodatnom opremom putem sufinansiranja u projektu "Stvaranje prihoda i radnih mjesta u poljoprivrednom sektoru u Bosni i Hercegovini - (IGAS) 2016-2020".

Projekat provodi "Caritas Švicarske" u saradnji sa Gradom Zenicom.

Svrha edukacije bila je da se korisnicima prenesu potrebna praktična znanja o proizvodnji povrća u zaštićenim prostorima. Prisutni su imali priliku čuti kako pripremiti mjesto i uslove za proizvodnju povrća u zaštićenom prostoru, kao i zemljište za sadnju povrća.



Na edukaciji su istaknute i prednosti plateničke proizvodnje koje se, između ostalog, ogledaju u prispjeću plodova van sezone, većim prinosima po jedinici površine, te većim brojem berbi tokom godine. Korisnici koji proširuju proizvodnju u projektu učestvuju

sa 40% od ukupne vrijednosti platenika, dok će 15 novih korisnika učestvovati sa 20%. Vrijednost jednog platenika sa dodatnom opremom iznosi 2940 KM. Prednost prilikom dodjele sredstava imale su nezaposlene osobe, prvenstveno mladi i žene.

ZEDA ODRŽALA EDUKACIJU ZA PROIZVOĐAČE NAMJEŠTAJA - SIGURNOSNI ZAHTJEVI NAMJEŠTAJA ZA ODGOJNO-OBRAZOVNE USTANOVE

Dana, 08. oktobra 2019. godine, Agencija ZEDA u okviru Projekta općinskog okolišnog i ekonomskog upravljanja (MEG) kojeg podržava i finansira Vlada Švicarske, a provodi Razvojni program Ujedinjenih nacija (UNDP) u BiH održala je edukaciju pod nazivom „Sigurnosni zahtjevi namještaja za odgojno-obrazovne ustanove“.

Edukacije je imala za cilj upoznati učesnike sa Zakonom o općoj sigurnosti proizvoda BiH, te praktičnim primjerima ispitivanja sigurnosnih zahtje-



va koje mora da zadovolji namještaj za odgojno-obrazovne ustanove.

Učešće na edukaciji je bilo be-

splatno, a svi učesnici su dobili uvjerenje o učešću koje mogu koristiti kao dokaz o stručnom usavršavanju.



EDUKACIJA U OKVIRU PODSTICAJA ZA “MOJ PRVI BIZNIS U GRADU ZENICA – START UP“ U AGENCIJI ZEDA

Grad Zenica je 27. septembra 2019. godine objavio Javni poziv za dodjelu bespovratnih podsticajnih sredstava iz Programa mjera za unapređenje privrede za 2019. godinu na području Grada Zenica, s ciljem unapređenja samozapošljavanja (pokretanje start up firmi), zapošljavanja, poboljšanja općih uslova za razvoj i konkurentnost obrta, malih i srednjih preduzeća, te unapređenja ženskog preduzetništva i preduzetništva mladih.

U okviru ovog Javnog poziva jedna od mjera koje će se realizovati jeste Podsticaj za “Moj prvi biznis u Gradu Zenica – START UP“. Svi koji su se prijavili na Javni poziv u okviru ove mjere imali su priliku da prisustvuju trodnevnoj edukaciji o osnovnim elementima poslovanja, pisanja biznis plana, te pravnog okvira neophodnog za registraciju i početak poslovanja.

Edukacija se realizovala u prostorijama Agencije ZEDA, a predavači

su bili zaposlenici Grada Zenice, Službe za privredu i upravljanje razvojem i Agencije ZEDA.

Cilj edukacije je bio da učesnici kvalitetnije popune formu biznis plana koja je obavezni i sastavni dio njihove aplikacije na ovaj Javni poziv.

Grad Zenica i Agencija ZEDA će pružiti podršku svim učesnicima i nakon edukacije u smislu savjetovanja i korekcija popunjenih biznis planova.

ODRŽAN CODESMASH HACKATON – STUDENTI TRAZILI NAJBOLJE IT RJEŠENJE PROTIV ZAGAĐENJA

U petak, 18. oktobra 2019. godine, u Agenciji ZEDA održan je CODESMASH HACKATHON na kojem su se studenti Politehničkog fakulteta UNZE, smjera Softversko inženjerstvo, takmičili u pronalasku najboljeg IT rješenja protiv zagađenja. Na takmičenju je učestvovalo ukupno 6 takmičarskih ekipa prve i druge godine ovog Odsjeka. Nakon dugog dana punog ideja i različitih rješenja, komisija je pobjednicima proglasila:

- 1. tim "First Tech"**
s projektom "ZEko"
- 2. tim „Lešinari“**
s projektom „Idi električno“
- 3. tim „Code Ninjas“**
s projektom „Green Force“

Organizatori ovog takmičenja bili su Politehnički fakultet UNZE i Softray Solutions koji su zajedno sa sponzorima, među



kojima je i Ministarstvo za obrazovanje, nauku, kulturu i sport Zeničko-dobojskog kantona obezbijedili vrijedne novčane nagrade za pobjednike. Studenti su pokazali znanje,

inovativnost, dosjetljivost i kreativnost, a dobro su se zabavili, stekli novo iskustvo i osvojili vrijedne nagrade. Bio je ovo prvi HACKATON u Zenici ali sigurno ne posljednji.



ZEDA I GRAD ZENICA ORGANIZOVALI “ENERGETSKE DANE 2019”

Dana 30. oktobra 2019. godine, najmlađi stanovnici našeg grada imali su priliku na zabavan i edukativan način dobiti korisne savjete o načinima upotrebe energije i značaju energijske efikasnosti. Događaj pod nazivom „Energetski dani 2019“ orga-

nizovali su Agencija ZEDA i Grad Zenica u okviru implementacije projektnih aktivnosti projekta GreenCap koji je ovim događajem zvanično i okončan.

Mališani su kroz pjesmu, ples, radionice i takmičenja doбили mnogo informacija kako da

daju svoju doprinos u očuvanju planete i kako da doprinesu energetskej efikasnosti. Predstave sa profesorom Baltazarom, videoprojeksije, eksperimenti, kolo znanja, nagrade, plesne tačke, smijeh i zabava obilježili su „Energetske dane 2019“.



Prijedoru. Tokom edukacije obrađen je Zakon o općoj sigurnosti proizvoda BiH – Praktična primjena, te Sigurnosni zahtjevi standarda za ispitivanje namještaja za sjedenje (BAS EN 12520, BAS EN 1022, BAS EN 1728, BAS EN 16139) i kreveta (BAS EN 1725). Edukacija je imala za cilj upoznati učesnike sa Zakonom

ZEDA ODRŽALA EDUKACIJU ZA PROIZVOĐAČE NAMJEŠTAJA U PRIJEDORU

Agencija ZEDA je u okviru Projekta općinskog okolišnog i ekonomskog upravljanja (MEG) kojeg podržava i finansira Vlada Švicarske, a provodi Razvojni program Ujedinjenih

nacija (UNDP) u BiH održala edukaciju pod nazivom „Sigurnosni zahtjevi namještaja za sjedenje i kreveta“.

Edukacija je realizovana u prostorijama Agencije PREDA u

o općoj sigurnosti proizvoda BiH, te praktičnim primjerima ispitivanja sigurnosnih zahtjeva koje mora da zadovolji namještaj za sjedenje i kreveti za kućnu upotrebu



„BUDI KREATIVAN I TI!“ –

DRUGI CIKLUS KREATIVNIH RADIONICA

Projekat „Budi kreativan i ti!“ Agencija ZEDA počela je implemetirati u aprilu 2019. godine. Prvi ciklus od 8 radionica realizovan je u saradnji s preduzećem „Fedi“ d.o.o. Zenica, a drugi siklus pokrenut je u maju i njegova

realizacija još uvijek traje. Tokom drugog ciklusa do sada je realizovano 13 radionica na kojima je učestvovalo više od 200 učesnica.

Projekat finansiraju: Agencija ZEDA, Grad Zenica i Federalno ministarstvo razvoja po-

duzetništva i obrta. Cilj ovog projekta je jačanje kompetencija i sticanje novih vještina koje će biti podloga svima onima koji usavrše tehnike i vještine kreativnog stvaranja da u budućnosti hobi pretvore u posao.

ZEDA REALIZOVALA KURS - ONLINE SHOP ZA MSP

Agencija ZEDA je u period od 24. septembra do 28. novembra 2019. realizovala kurs web programiranja koji je bio namijenjen onima koji su bili zainteresovani da nauče tehnike jednog od najpopularnijih CMS-ova, Wordpressa i obuhvatio je sve od osnovnih postavki Wordpress site-a do upoznavanja i postavljanja WooCommerce plugina za aktiviranje web trgovina.

Cilj ovog kursa bio je da se polaznicima daju osnovne informacije i znanje kako bi bili u mogućnosti samostalno postaviti razvojno okruženje, započeti i završiti programiranje web trgovine koristeći se Wordpress CMS-om.

PREZENTACIJA PROGRAMA DEVELOPPP.DE – JAČANJE SARADNJE SA PRIVATNIM SEKTOROM UZ PODRŠKU REGIONALNOG SERVISNOG CENTRA (RSC)

Dana, 19. novembra 2019., Grad Zenica i Agencija ZEDA u saradnji sa Regionalnim servisnim centrom (RSC) održali su prezentaciju develoPPP.de programa u Impulsnom kreativnom centru Agencije ZEDA.

Ovaj Program podržava postojeće projekte GIZ-a u u razvoju novih partnerstava sa privatnim sektorom sa posebnim fokusom na program develoPPP.de

Treba napomenuti da je develoPPP.de prije više od 20 godina osnovalo njemačko Federalno ministarstvo za ekonomsku saradnju i razvoj (BMZ) kako bi potaknulo su-



djelovanje privatnog sektora u područjima u kojima se poslovne prilike i inicijative razvojne politike preklapaju. U tu svrhu BMZ nudi finansijsku i tehničku podršku kompanijama koje žele poslovati ili su već započele s radom u zemljama u razvoju i tržištima u nastajanju.

Program je namijenjen za respektabilne firme koje mogu utjecati na širu društvenu zajednicu i koje su

spreme dijeliti informacije sa konkurencijom ili drugim firmama. Jedan od uslova Programa jeste da firme imaju preko 8 zaposlenih, preko 800.000 € godišnjeg prometa i da su najmanje dvije godine aktivne na tržištu.

Firmama su predstavljeni ciljevi, kriteriji, vrste ugovora i mogućnosti učešća, prezentovani su dobri primjeri develoPPP.de projekata iz zemlje i regije, navedeni su primjeri razvojnih partnerstava u regiji, te su učesnici imali priliku postaviti pitanja i saznati potrebne detalje za eventualno sudjelovanje u Programu.

ZEDA I IMTEC ODRŽALI KONFERENCIJU - “CYBER PRIJETNJE I ZAŠTITA U PROCESU DIGITALIZACIJE POSLOVANJA ZA MSP”

Dana 05. decembra 2019. godine, ZEDA i IMTEC održali su konferenciju na temu: „Cyber prijetnje i zaštita u procesu digitalizacije poslovanja za MSP”.

Konferencija je održana s ciljem da se pomogne pravnim licima da se zaštite od cyber

napada i da se bolje upoznaju sa digitalnom transformacijom i opasnostima koje donosi sa sobom. Preduzeća su ovom prilikom upoznata i sa načinima i mogućnostima hardverske i softverske zaštite, dostupnim alatima za zaštitu, važnosti korištenja IT tehnolo-

gija za zauzimanje pozicije na globalnom tržištu i sl.

Cyber sigurnost će zasigurno poduprijeti ekonomski prosperitet preduzeća i omogućiti malim preduzećima rast, inovacije i pronalaženje novih načina stvaranja vrijednosti za svoje kupce.

OKONČAN DRUGI CIKLUS CNC KURSEVA U AGENCIJI ZEDA - “OSNOVE CNC PROGRAMIRANJA I RUKOVANJA CNC MAŠINAMA”

U periodu od 18. novembra do 09. decembra 2019. godine ZEDA je organizovala drugi ciklus kurseva “Osnove CNC programiranja i rukovanja CNC mašinama”.

Kurs je učesnicima omogućio da nauče osnove CNC programiranja i rukovanja CNC glodalicama.

Nakon završene obuke polaznici su osposobljeni da samostalno mogu napraviti jednostavnije predmete tehnologijom rezanja na CNC glodalici.

Kurs je realizovan u prostorijama Agencije ZEDA na Proxxon FF500 glodalicama, kao i na Proxxon MF 70 glodalicama, a učesnici su dobili potvrdu o završenoj obuci.



U ZENICI PROMOVISANA UNIJA STARTUPA ZEUS I POTPISANI UGOVORI O DODJELI BESPOVRATNIH PODSTICAJNIH SREDSTAVA



U okviru drugog Javnog poziva za dodjelu podsticaja iz Programa mjera za unapređenje privrede za 2019. godinu na području Grada Zenica za “Moj prvi biznis u Gradu Zenica - START UP” dodijeljeno je 45.000, 00 KM za 11 korisnika sredstava.

Isti dan, 18. decembra u prostora-

rijama Agencije ZEDA upriličena je promocija projekta “Start-up zajednica Grada Zenice”.

U sklopu ovog projekta formirana je Zenička Unija Startupa ZEUS, čiji je cilj promocija startup Zajednice grada Zenice, jačanje infrastrukture koja podržava održivi startup ekosistem, održavanje regi-

onalnog ekonomskog rasta fokusirajući se na korištenje tržišnih prilika i snaga zajednice te podršku ekonomskom razvoju Zajednice grada Zenice kroz izgradnju preduzetničkih kapaciteta, edukaciju i poslovnu inkubaciju.

Na promociji projekta “Start-up zajednica Grada Zenice” potpisani su i ugovori sa korisnicima odabranim po Javnom pozivu za dodjelu podsticaja iz Programa mjera za unapređenje privrede za 2019. godinu na području grada Zenice za “Moj prvi biznis u Gradu Zenica – START UP”.

Grad Zenica podržao je realizaciju projekta “Start-up zajednica Grada Zenice”, sa 2.000,00 KM.

Inicijator projekta je Udruženje poslodavaca Zenica.

PRIJEDLOG IZMJENE I DOPUNE U PROGRAMU MJERA ZA UNAPRJEĐENJE POLJOPRIVREDNE PROIZVODNJE NA PODRUČJU GRADA ZENICA U 2019. GODINI

Prijedlog Izmjena je urađen na inicijativu jednog od vijećnika, a razlozi za ovu izmjenu su nepovoljne vremenske prilike koje su uticale na smanjenu proizvodnju i nemogućnost ispunjavanja kriterija od 900 kg jagodičastog voća za ostvarivanje prava na podsticaj. Stoga, pravo na podsticaj bi trebali imati poljoprivredni proizvođači koji su proizveli i predali minimal-

no 500 kg jagodičastog voća. Prijedlog Izmjena urađen je na osnovu Dopisa od strane poljoprivrednih proizvođača koji imaju registrovanu poljoprivrednu djelatnost, (osnovnu i dopunsku), u kojem se traži da se ne ograničava maksimalni iznos podsticaja. Programom je definisan maksimalni iznos podsticaja za registrovane poljoprivredne proizvođače na 5.000,00

KM. Nekolicina registrovanih farmi su po isplati drugog kvartala dosegle iznos od 5.000,00 KM. Stav Službe za privredu i upravljanje razvojem je da se maksimalni iznos podsticaja za registrovane poljoprivredne proizvođače može povećati na 10.000,00 KM kako bi registrovane farme sa većim broj grla ostvarile podsticaj i u trećem kvartalu.

AMBASADORICA AUSTRIJE DR. HARTMANN POSJETILA GRADONAČELNIKA KASUMOVIĆA



Austrijska ambasadorica u Bosni i Hercegovini, dr. Ulrike Hartmann posjetila je gradonačelnika Zenice Fuada Kasumovića. Ambasadorica Hartmann proteklih šest godina u BiH je radila poslove šefice kabineta Visokog predstavnika u BiH i specijalne predstavnice za EU i koordinaciju s među-

narodnim organizacijama, te dobro poznaje prilike u našoj državi. Tokom jednosatnog prijateljskog susreta, gradonačelnik Kasumović upoznao je ambasadoricu Hartmann sa aktuelnim projektima u gradu, kao i planovima koje namjerava poduzeti u narednom periodu s ciljem pobolj-

šanja uslova života u Zenici. Vlada prijateljske Austrije zajedno sa njemačkim KfW-om učestvuje i realizaciji projekta prikupljanja i prečišćavanja otpadnih voda u našem gradu, zbog čega je ambasadorica dr Hartmann posjetila i Javno preduzeće "Vodovod i kanalizacija" d.o.o. Zenica.

ODRŽAN „1. SAJAM PČELARSTVA NEMILA 2019”

Udruženje građana pčelara “Pčela Nemila” je 14. septembra organizovalo „1. Sajam pčelarstva Nemila 2019”. U okviru sajma priređen je i okrugli stol o značaju pčela za ljudsku zajednicu pod nazivom: “Značaj pčelarstva za život i zdravlje ljudi”. Tom prilikom dodijeljena su priznanja uglednim pčelarima, a održano je i predavanje Ferida Velagića na temu “Proizvodnja matica po sistemu Ferida Velagića”.

Mnogi ljubitelji pčelarstva posjetili su sajam i dali doprinos svojim učešćem. Na platou centra Nemile upriličena je svečanost povodom „1. Sajma pčelarstva Nemila 2019”, gdje su se okupili brojni proizvođači meda i proizvoda od meda Nemilskog sliva, kao i mnogobrojni gosti iz susjednih gradova.



Petnaestak izlagača predstavilo je svoje proizvode, kojima se na učešću zahvalio i Zeinir Halilović, predsjednik Udruženja “Pčela Nemila”. Istaknuta podrška Gradske uprave i gradonačelnika Fuada Kasumovića kojem je tom prilikom dodijeljeno priznanje za doprinos u razvoju i radu Udruženja.

Od samog početka, Grad Zenica podržao je Udruženje pčelara “Pčela Nemila” što se svakako ogleda kroz dodjelu bespovratnih sredstava u iznosu od 3.700 KM u okviru Javnog poziva za nevladine organizacije na koji je ovo Udruženje apliciralo u 2018. godini.

ODRŽAN „13. SAJAM ORGANSKE PROIZVODNJE ZENICA 2019”



Pod pokroviteljstvom Grada Zenica i gradonačelnika Fuada Kasumovića, Savez udruženja organske proizvodnje Federacije BiH organizovao je na Trgu Alije Izetbegovića „13. Sajam organske proi-

zvodnje Zenica 2019””. Učešće su uzeli poljoprivredni proizvođači sa područja Zenice i nekoliko općina iz Centralne BiH. Na sajamskim policama zastupljeni su pčelinji proizvodi, voće, povrće, kao i proizvodi

od voća i povrća, te čajevi i ljekovito bilje.

U znak zahvalnosti za podršku poljoprivrednom sektoru organizatori su gradonačelniku Kasumoviću uručili „Zlatnu korpu organskih proizvoda”.

PREDSTAVNICI GRADA ZENICE NA 3. BIZNIS FORUMU BRČKO DISTRIKTA BIH - "DIJASPORA ZA PARTNERSTVO"

U Domu kulture u Brčkom od 03. do 05. oktobra 2019. godine održan je 3. Biznis forum Brčko distrikta Bosne i Hercegovine, na temu „Dijaspora za partnerstvo“.

Biznis forum organizovan je uz podršku Vlade Brčko Distrikta BiH, u saradnji s projektom „Dijaspora za razvoj“ – projekt Ministarstva za ljudska prava i izbjeglice BiH i Vlade Švicarske, u partnerstvu s Razvojnim programom Ujedinjenih naroda (UNDP), Međunarodnom organizacijom za migracije (IOM), uz tehničku podršku Udruženja računovođa, forenzičara i revizora Brčko distrikta BiH kao i podršku Ekonomskog fakulteta u Brčkom Univerziteta u Istočnom Sarajevu.

Grad Zenica na Biznis forumu predstavljale su Edina Hodžić



i Maša Škrbić. U svojstvu koordinatorice projekta „Dijaspora za razvoj“, Maša Škrbić je na panel diskusiji „Dijaspora za partnerstvo“ predstavila primjer dobre prakse u našoj Gradskoj upravi. Naime, Grad Zenica jedan je od partnera

na projektu D4D (Development for diaspora) pokrenut od strane Ministarstva za ljudska prava i izbjeglice BiH i Vlade Švicarske, u partnerstvu sa UNDP BiH i IOM BiH, kroz koji se ovu godinu uspješno realizuje projekat „Podrška zapošljavanju u metaloprerađivačkoj industriji u gradu Zenici u saradnji sa privrednim subjektima iz dijaspore“, kroz koji će biti zaposleno 15 kandidata koji prođu obuku u jednoj od lokalnih kompanija.

Cilj Biznis foruma u Brčko Distriktu BiH bio je da se lokalna zajednica trudi napraviti ambijent koji će omogućiti da mladi ostanu, a oni koji su otišli u inostranstvo, da na neki način svojim angažmanima pomognu razvoju svoje lokalne zajednice.

POSJETA DELEGACIJE AMBASADE ŠVICARSKJE U BIH I UNDP-A GRADSKOJ UPRAVI ZENICE

Patrick Egli, šef odjela za međunarodnu pomoć u Ambasadi Švicarske u BiH i Merima Avdagić, menadžerica projekta „Dijaspora za razvoj“ (D4D), posjetili su Gradsku upravu Zenice gdje su se sastali sa gradonačelnikom Fuadom Kasumovićem i njegovim saradnicima.

„Dijaspora za razvoj“ je projekat Ministarstva za ljudska prava i izbjeglice BiH i Vlade Švicarske, u partnerstvu sa UNDP BiH i IOM BiH.

Grad Zenica jedna je od dvadeset lokalnih zajednica u kojima se provodi projekat D4D, čiji je cilj jačanje uloge bh. dijaspore u razvojnim procesima u BiH. U sklopu ovog projekta u Gradu Zenica podržana je lokalna razvojna inicijativa „Podrška zapošljavanju u metaloprerađivačkoj industriji u Gradu Zenici u saradnji sa privrednim subjektima iz dijaspore“.

Delegacija Ambasade Švicarske u BiH i UNDP-a je pret-



hodno posjetila kompaniju Fuel Boss d.o.o. Zenica, koja je kroz lokalnu razvojnu inicijativu „Podrška zapošljavanju u metaloprerađivačkoj industriji u Gradu Zenici u saradnji sa privrednim subjektima iz dijaspore“ omogućila mladim ljudima da kroz program obuke, prekvalifikacije i dokvalifikacije u metaloprerađivačkoj industriji, dobiju nova radna mjesta. Ukupna vrijednost projekta „Podrška zapošljavanju u me-

taloprerađivačkoj industriji u Gradu Zenici u saradnji sa privrednim subjektima iz dijaspore“ je oko 80.000 KM. Nakon realizacije tri ciklusa obuke, 16 obučanih bravara i zavarivača je dobilo posao.

Zaključeno je da je potrebno nastaviti aktivnosti s ciljem uključivanja planova vezanih za dijasporu u lokalne razvojne strategije, kako bi angažman i saradnja sa dijasporom postao trajni strateški cilj.

9. SAJAM POLJOPRIVREDNE I ORGANSKE PROIZVODNJE I ETNO NARODNOG STVARALAŠTVA „OPEN'S ZENICA 2019”

Na Trgu Alije Izetbegovića održan je 9. sajam poljoprivredne i organske proizvodnje i etno narodnog stvaralaštva „OPEN's Zenica 2019”. Na sajmu kojeg organizuje Udruženje poljoprivrednika Zeničko-dobojskog kantona učestvovalo je više od stotinu izlagača iz Zenice, ZDK, kao i drugih gradova iz BiH.

Na sajmu su zastupljeni svi oblici poljoprivredne proizvodnje, a u okviru pratećeg programa održan je i okrugli sto na čelu sa Enverom Avdićem, direktorom kompanije “ESOF”, partnera sajma.



AMBASADOR SAD-A U BIH, ERIC NELSON POSJETIO AGENCIJU ZEDA

Dana 15. oktobra 2019.godine, Ambasador SAD u BiH Eric Nelson posjetio je Agenciju ZEDA. Ovom prilikom, Ambasador se upoznao sa radom Agencije, obišao prostorije Impulsnog kreativnog centra, Centra za podršku poduzetnicima, te Laboratorije LIND.

Osoblje Agencije i Službe za privredu i upravljanje razvojem Grada Zenice je predstavilo Ambasadoru način djelovanja i osnovne aktivnosti Agencije, kao i osnovne informacije o trenutnom stanju privrede, mjerama koje se poduzimaju za potrebe daljnjeg razvoja kao i pozitivne trendove koji se dešavaju u tom smislu. Poslovna zona Zenica 1 predstavlja veliko gradilište u ovom trenutku jer su u toku građevinski radovi na obezbjeđivanju neophodne komunalne infrastrukture kao i izgradnja objekata od strane preduzeća koja su kupila zemljište u Poslovnoj zoni, što se Ambasador mogao i uvjeriti prilikom terenske posjete lokaciji.



Ambasador je u toku posjete izrazio želju da se upozna sa radom preduzeća koje se nalaze u procesu inkubacije u Biznis inkubatoru. Tim povodom je upriličena posjeta firmama New Trend d.o.o, DevStetic Solutions, te Commerce Care. Nakon toga, posjetio je i Glovis d.o.o., preduzeće koje je prošlo kompletan proces inkubacije u Biznis inkubatoru i izraslo u firmu koja sada već ima svoj

vlastiti objekat u Poslovnoj zoni Zenica 1 i nastavlja sa daljnjim razvojem.

Ambasador je izrazio svoje zadovoljstvo viđenim, te je pohvalio zeničku privredu kao i rad Agencije. Posjeta Ambasadora Agenciji ZEDA i navedenim preduzećima predstavlja svojevrsno priznanje kvalitetu rada Agencije i Gradske uprave i napretku stanja privrede u Zenici.

ZEDA SA BH. PRIVREDNICIMA NA SAJMU U TURSKOJ/INTERMOB I WOODTECH ISTANBUL



Još jedna prilika za saradnju bosanskohercegovačkih privrednika s turskim, otvorena je u periodu od 14. do 16. oktobra 2019. godine kada su bh. privrednici otputovali na 22. Međunarodni sajam INTERMOB i 32. Međunarodni sajam WOODTECH u Istanbulu. Agencija ZEDA je u saradnji sa centrom BIGMEV (Centar za razvoj odnosa sa Bosnom i Hercegovinom) i Privrednom ko-

morom Federacije Bosne i Hercegovine organizovala ovu posjetu privrednika iz Bosne i Hercegovine Republici Turskoj, a posjeta je realizovana u koorganizaciji sa partnerom iz Republike Turske – Privrednom komorom za industriju u Istanbulu, a uz podršku Grada Zenice i u saradnji sa Udruženjem poslodavaca Zenica. Ova posjeta upriličena je u okviru realizacije aktivnosti

projekta BITNET/COSME program Evropske unije u kojem je Agencija ZEDA član Evropske poduzetničke mreže Federacije BiH.

BH. privrednici posjetu sajmu su iskoristili za razmjenu informacija i kupovinu mašina koju je realizovalo nekoliko kompanija. Također, bh. kompanije su dogovorile buduću saradnju sa turskim kompanijama i isporuku potrebne opreme i materijala.

ZEDA UGOSTILA AMBASADORA VELIKE BRITANIJE I BRITISH COUNCIL

Dana 10. decembra 2019. godine, u Agenciji ZEDA održano je „Takmičenje u programiranju“ koje je organizovano u sklopu programa „Škole za 21. vijek“ koji u Bosni i Hercegovini implementira British Council, a podržava Vlada Velike Britanije. Škole iz prvog, od pet, ciklusa obuka bile su pozvane da predaju svoje radove u digitalnom formatu, nakon čega je stručni žiri pozvao 20 najboljih radova na takmičenje koje je održano u Agenciji ZEDA. Tema takmičenja je bila da se odgovori na neki od Ciljeva održivog razvoja koje je definisao UN. Takmičenju su prisustvovali N.J.E. Matthew



Field, ambasador Velike Britanije u Bosni i Hercegovini i Spahija Kozlić, ministar obrazovanja, nauke, kulture i sporta Zeničko-dobojskog kantona, te brojni učenici i nastavnici. Pobjednici ta-

kmičenja u programiranju na nivou zemlje, imaće priliku da učestvuju na regionalnom takmičenju koje će se održati u sklopu Digitalnog Samita za Zapadni Balkan, u aprilu 2020. godine u Tirani.

Novoimenovana direktorica Ureda Europske banke za obnovu i razvoj (EBRD) u BiH Manuela Naessl i dosadašnji direktor Ian Brown posjetili su Gradsku upravu Zenice gdje im je domaćin bio gradonačelnik Fuad Kasumović sa saradnicima.

Gradonačelnik Kasumović je na samom početku sastanka zahvalio dosadašnjem direktoru Ianu Brownu na podršci u



PREDSTAVNICI EBRD-a U POSJETI GRADSKOJ UPRAVI ZENICE

realizaciji najznačajnijih projekata za Grad Zenica kao što su grijanje, projekat "Plava voda", program "Zeleni gradovi", te poboljšanje energetske efikasnosti u JU Kantonalna bolnica Zenica.

U fokusu ovog susreta bili su projekat izgradnje Interventne kardiologije Kantonalne bolnice Zenica, Akcioni plan zeleni gradovi za Grad Zenicu, te pro-

jekat izgradnje žičare do zeničkog izletišta Smetovi. Gradonačelnik Kasumović je naglasio da se usvajanje Akcionog plana od strane Gradskog vijeća Zenica očekuje do kraja ove godine. Projekat Akcioni plan zeleni gradovi za Grad Zenica finansiran je od strane Federalnog ministarstva finansija uz podršku EBRD-a čiji su konsultanti radili na identifikaciji i analizi

izvora zagađenja u gradu Zenica. Na osnovu dobijenih rezultata odredit će se prioriteta za kreiranje politike u oblastima urbane i komunalne infrastrukture, vodosnabdijevanja i odvodnje otpadnih voda, javnog prijevoza, kvalitete zraka, energetike i klimatskih promjena. Dosadašnji direktor EBRD-a za BiH Ian Brown predložen je za počasnog građanina Zenice.

GRAD ZENICA PODRŽAO RAD UDRUŽENJA CIVILNIH ŽRTAVA RATA

Grad Zenica putem Službe za boračko-invalidsku i socijalnu zaštitu, stambene poslove i društvene djelatnosti, Službe za privredu i upravljanje razvojem i Službe za ekologiju, komunalne i inspeksijske poslove raspisao je Javni poziv organizacijama civilnog društva/nevladinim organizacijama sa područja Grada Zenice za predaju prijedloga projekata u sklopu raspodjele budžetskih sredstava za 2019. godinu, u okviru kojeg je "Udruženje civilnih žrtava rata Grada Zenice" za predaju svog projekta dobilo sredstva u iznosu od 5.000,00 KM.

Projekat koji je Gradska uprava finansirala podrazumijeva program poljoprivredne podrške za osobe sa trajnim invaliditetom (civilne žrtve rata) od 20 do 100 % invalidnosti, a



koji su nastanjeni u ruralnim područjima Zenice. Projektom je planirana nabavka pet motokultivatora i prateće opreme koji finansira Udruženje civilnih žrtava rata Grada Zenice dok je kupovinu plastenika finansirao Grad Zenica.

Projekat koji je podržala Gradska uprava nosi naziv "Poboljšavanje životnih uslova osoba sa invaliditetom i omogućava-

nje pristupa resursima za rad u poljoprivredi na ruralnim područjima Grada Zenice". Osnovni ciljevi su: samozapošljavanje osoba sa invaliditetom u ruralnim područjima Zenice, podrška za dugoročnu održivost kroz stručnu edukaciju, konsultacije i plasman proizvoda i poboljšanje kvaliteta života osoba sa invaliditetom i njihovih porodica.



ZAVRŠENI RADOVI NA PROJEKTU

“REKONSTRUKCIJA I UREĐENJE IZLETIŠTA SMETOVI”

Projekat “Rekonstrukcija i uređenje izletišta Smetovi” kojeg je realizovala i osmislila Služba za privredu i upravljanje razvojem Grada Zenice je okončan i uspješno realizovan.

Uz određene izmjene na lokacijama su postavljeni zabavni sadržaji za najmlađe, kao i sportski sadržaji za rekreativce (mali nogomet, košarka, odbojka), a što će svakako biti mnogo funkcionalnije i kvalitetnije od prvobitnog izgrađenog.

Projekat “Rekonstrukcija i



uređenje izletišta Smetovi” podrazumijevao je: uređenje igrališta za djecu do 5 godina, postavljanje klupa oko malog i velikog igrališta, te postavljanje setova stolova i stolica duž šetačke staze od restorana „Salčinović“ do spomenika, asfaltiranje terena za mali nogomet sa dva aluminijska gola, asfaltiranje terena za košarku sa dvije košarkaške konstrukcije, postavljanje sjedala od impregniranog drveta na tribine oko sportskih terena, popravljanje ograde oko sportskih terena, igralište za veliku djecu, te rekonstrukciju

postojećeg igrališta odbojke na pijesku. Uređenje popularnog zeničkog izletišta podrazumijevalo je niz projektnih aktivnosti, od kojih je njih nekoliko već realizovano, između ostalih i postavljanje 18 setova klupa duž puta ka spomeniku. Vrijednost cjelokupnih projektnih aktivnosti je oko 140.000 KM. Pokretač projekta je Grad Zenica, a isti se realizuje uz podršku Javnog preduzeća za upravljanje i održavanje sportskih objekata Zenica, Ministarstva privrede ZDK, “Salčinović” d.o.o., “Glovis” d.o.o. i “Zeničke razvojne agencije ZEDA” d.o.o.

POSLOVNA ZONA “ZENICA JUG” STRATEŠKA LOKACIJA SA OGROMNIM POTENCIJALOM

Tri mjeseca nakon što je u Zenici potpisan Memorandum kojim se definišu prava i obaveze Grada Zenice i kompanije “Rasiyat” u pogledu utvrđivanja uslova za realizaciju projekta izgradnje trgovačkog centra i rekreativnog kompleksa Poslovno rekreativnoj turističkoj zoni “Zenica-Jug”, direktor kompanije iz Ujedinjenih Arapskih Emirata Muhammad A. Al-Yamani posjetio je Gradsku upravu i buduću poslovnu zonu „Zenica Jug“ poznatiju kao “Antena”.

Kompanija “Rasiyat” u Zenici želi graditi najsavremeniji trgovački centar i rekreativni kompleks jedinstven takve vrste u Evropi, a kako je tokom sastanka sa gradonačelnikom Fuadom Kasumovićem istakao gospodin Al-Ya-



mani, možda i u čitavom svijetu. Tokom boravka u Zenici, gospodin Al-Yamani obišao je nekoliko lokacija koje su investitorima interesantne, u čemu je imao veliku podršku Gradske uprave Zenica.

Kada je riječ o Poslovnoj zoni Zenica-Jug, treba napomenuti da je Gradsko vijeće Zenice na Sjednici održanoj 28.

novembra 2019. godine objavljeno o fazama u pripremi Regulacionog plana za Poslovnu zonu Zenica-Jug, za koju su urbanistička rješenja već donesena. Očekuje se da će master plan poslovne zone biti izrađen do kraja godine, nakon čega će urbanistička rješenja biti predstavljena Gradskom vijeću.

Dana 20. novembra 2019. godine je u Poslovnoj zoni “Zenica 1” održana svečanost povodom završetka projekta “Izgradnja saobraćajnica 7, 7a i 7b sa pratećom komunalnom infrastrukturom”. Vrijednost projekta iznosi oko 700.000 KM, od čega je Grad Zenica osigurao 300.000 KM, dok su sufinansijeri Federalno ministarstvo razvoja, obrta i poduzetništva sa 250.000 KM i Ministarstvo privrede ZDK sa 150.000 KM. U sklopu ovog projekta u Poslovnoj zoni “Zenica 1” izgrađene su tri saobraćajnice u ukupnoj du-



POSLOVNA ZONA ZENICA 1 POSTAJE OKOSNICA RAZVOJA GRADA

žini od 414 metara, izgrađena je i obnovljena fekalna kanalizacija u dužini od 1.136,38 metara, a riješen je i dugogodišnji problem odvodnje oborinskih voda. Također, budućim investitorima na raspolaganju je i novoizgrađena plinska i telekomunikacijska infrastruktura.

Cilj ovog Projekta je unaprjeđenje i modernizacija infrastrukture u pogledu poboljšanja pristupa, kapaciteta, kvaliteta i atrak-

tivnosti poslovnih zona u gradu Zenica. Intencija Grada Zenica je da se zadovolje potrebe malih i srednjih preduzeća. Pored infrastrukturnog uređenja postojećih parcela, ovim projektom je riješena infrastruktura i na slobodnom građevinskom zemljištu u površini cca 25.000 m², što omogućava formiranje novih parcela i ulazak novih korisnika u Zonu, te nova zapošljavanja.

Osim infrastrukture u Poslovnoj

zoni “Zenica 1” računa je vođeno i o hortikulturi. Zasađene su desetine stabala, kako bi u ovoj zoni bio stvoren što povoljniji ambijent.

Kako bi se doprinijelo unaprjeđenju infrastrukture u Poslovnoj zoni, duž Saobraćajnice br.1 u toku su radovi na izgradnji kanalizacione mreže i pitke vode. Izvođač radova je „Špic beton“, a okončanje radova se očekuje početkom 2020.godine.

U ZENICI USPJEŠNA IMPLEMENTACIJA PROJEKTA “STVARANJE PRIHODA I RADNIH MJESTA U POLJOPRIVREDNOM SEKTORU U BOSNI I HERCEGOVINI - (IGAS) 2016-2020

Grad Zenica u saradnji sa Caritasom Švicarske uspješno realizuje projekat “Stvaranje prihoda i radnih mjesta u poljoprivrednom sektoru u Bosni i Hercegovini - (IGAS) 2016-2020”. U sklopu ovog projekta za dvadeset korisnika dodijeljeni su plastenici sa dodatnom opremom. Isporuka plastenika izvršena je početkom novembra ove godine. Većina korisnika obavila je sjetvu i sadnju jesenjih kultura salate, špinata i luka. U aprilu 2020. godine planirana je podjela sadnog materijala paradajza, paprike i krastavca. Prvi puta sredstva koristi petnaest korisnika, dok pet korisnika proširuju proizvodnju, jer su ranije učestvovali u projektu “Stvaranje prihoda i radnih mjesta u poljoprivrednom sektoru u Bosni i Hercegovini” u 2017. godini. Odabir korisnika je izvršen na osnovu Javnog poziva za dodjelu plastenika od



100 m² sa dodatnom opremom putem sufinansiranja u projektu “Stvaranje prihoda i radnih mjesta u poljoprivrednom sektoru u Bosni i Hercegovini - (IGAS) 2016-2020”. Vrijednost jednog plastenika sa dodatnom opremom iznosi 2.940 KM.

Prednost prilikom dodjele sredstava imale su nezaposlene osobe, prvenstveno mladi i žene koji posjeduju vlastito poljoprivredno zemljište ili na drugi način raspoložu poljoprivrednim zemljištem u neposrednoj blizini stambenog objekta u kojem stanuju.

GRAD ZENICA I AGENCIJA ZEDA NA UVODNOJ RADIONICI ZA KREIRANJE STRATEGIJE RAZVOJA MALIH I SREDNJIH PREDUZEĆA U ZENICI ZA PERIOD 2021-2027.

Dana, 22. oktobra 2019. godine, održana je Uvodna radionica za kreiranje strategije razvoja malih i srednjih preduzeća u Zenici za period 2021-2027. Grad Zenica i Agencija ZEDA su domaćini procesa izrade Strategije i timovi iz Gradske uprave i Agencije ZEDA će aktivno učestvovati u pripremi Strategije dok će tim Agencije EDA pružati metodološku po-

moć pri izradi Strategije. Na Uvodnoj radionici je praktično prvi put predstavljena standardizovana metodologija za strateško planiranje razvoja MSP u BiH, koju su zajedno izradili timovi Ministarstva vanjske trgovine i ekonomskih odnosa BiH, Federalnog ministarstva razvoja, poduzetništva i obrta, Ministarstva privrede i preduzetništva RS i Odjela za privredni razvoj,

sport i kulturu BD, uz podršku Agencije Eda, u sklopu projekta „SBA u BiH – Okvir za razvoj strategija i politika za MSP“. Njenom primjenom treba da se obezbijedi horizontalna i vertikalna koordinacija i harmonizacija strategija i politika za razvoj MSP u zemlji, u skladu sa evropskim okvirom sadržanim u Aktu o malom biznisu (Small Business Act).

PROMOTIVNI FILM U SVRHU PREZENTACIJE OSTVARENIH CILJEVA I REZULTATA PROJEKTA LIFE

Međunarodna finansijska korporacija, članica Grupacije Svjetske banke napravila je kratki promotivni film u svrhu prezentacije ostvarenih ciljeva i rezultata projekta LIFE koji je realizovan u saradnji sa Gradskom upravom Zenica.

Promotivni film na slikovit i direktan način prikazuje kako je unaprijeđen rad administracije Grada Zenice, što je rezultiralo efikasnijim servisiranjem privrednika i građana u partnerskim gradovima i općinama gdje je realizovan projekat LIFE. Ostvareni rezultati su od interesa za investitore i privrednike, kao i za sve građane koji koriste usluge grada, općine ili kantona. Projekat poboljšanja poslov-



nog okruženja i privlačenja investicija na lokalnom nivou – LIFE, provodi Međunarodna finansijska korporacija IFC, članica Grupacije Svjetske banke, a finansira Vlada Ujedinjenog Kraljevstva, putem UKaid-a. Grad Zenica je reali-

zaciji ovog projekta pristupio u martu 2018. godine i za godinu dana kroz projekat LIFE analizirano je svih 165 administrativnih postupaka koje Gradska uprava provodi, od kojih je 90 posto pojednostavljeno ili unaprijeđeno.

ZAHVALJUJUĆI PROJEKTU “DIJASPORA ZA RAZVOJ” U ZENICI OTVORENO 16 NOVIH RADNIH MJESTA

U Gradskoj upravi Zenice predstavljeni su rezultati projekta “Podrška zapošljavanju u metaloprerađivačkoj industriji u gradu Zenici u saradnji sa privrednim subjektima iz dijaspori”.

Radi se o zajedničkoj lokalnoj razvojnoj inicijativi Grada Zenice sa projektom “Dijaspora za razvoj”, koji je projekat Ministarstva za ljudska prava i izbjeglice BiH i Vlade Švicarske, a u partnerstvu sa UNDP BiH i IOM BiH.

Projektne aktivnosti uključivale su izradu i provođenje programa obuke, prekvalifikacije, dokvalifikacije i stručnog osposobljavanja za 40 aplikanata za usavršavanje profila bravara i zavarivača te profila bravara odnosno cjevvara, s ciljem zapošljavanja novih radnika u metaloprerađivačkoj industriji, a realizovane su u direktnoj saradnji s kompanijom FB Mont iz Slovenije, odnosno njihovom sestrinskom firmom Fuel Boss d.o.o., Zenica.

Ukupna vrijednost projekta “Podrška zapošljavanju u metaloprerađivačkoj industriji u gra-



du Zenici u saradnji sa privrednim subjektima iz dijaspori” je 91.500,00 KM.

Implementacijom projekta omogućeno je zapošljavanje 16 kandidata koji su uspješno završili program obuke.

Također, projekat je unaprijeđio postojeću saradnju sa dijasporom, omogućio je izradu i provođenje programa stručnog osposobljavanja uz mentorstvo dijaspori u cilju zapošljavanja u metaloprerađivačkoj industriji, kreiranje novih radnih mjesta, mapiranje potencijalnih privrednika i investitora iz dijaspori, integriranje prikupljenih podataka u registar dijaspori u svrhu bu-

dućeg povezivanja i umrežavanja privrednika. ZEDA je provodila aktivnost mapiranja u okviru koje je kreirala obrasce za fizička i pravna lica, te NVO i došla do podataka koji su pokazali u kojim zemljama boravi zenička dijaspora, na koji način su spremni doprinijeti rodnom gradu, te šta je to što se mora unaprijediti.

Pored zapošljavanja novih radnika, u sklopu projekta “Dijaspora za razvoj”, u Gradu Zenica su pokrenute i dvije nove elektronske usluge E-MATIČAR i E-DIJASPORA, čime se željelo olakšati dobivanje uvjerenja i izvoda iz matičnih knjiga građanima koji žive i rade u inostranstvu.

FOND ZA ZAŠTITU OKOLIŠA FBIH PODRŽAO NEKOLIKO PROJEKATA GRADA ZENICE

Na osnovu provedenog Javnog konkursa za dodjelu sredstava u vidu finansijske pomoći kao podrška realizaciji programa, projekata i sličnih aktivnosti iz područja zaštite okoliša za 2019. godinu – JK2019, Fond za zaštitu okoliša Federacije BiH donio je Odluku o odabiru korisnika sredstava Fonda za zaštitu okoliša Federacije BiH. Prema ovoj Odluci podržani su sljedeći projekti na koje je aplicirao Grad Zenica.

- Projekat utopljanja Doma armije sa 80.000,00 KM,
- Izgradnja kanalizacionog sistema na području sliva Babina rijeka – Zenica sa 120.000,00 KM,
- Uspostavljanje sistema jav-



- nih bicikala u Gradu Zenica sa 60.000,00 KM,
 - Uklanjanje ambrozije na području Grada Zenica sa 6.300,00 KM.
- Ukupna vrijednost odobrenog

sufinansiranja od strane Fonda za zaštitu okoliša FBIH za ove projekte Grada Zenica iznosi 266.300,00 KM. Realizacija navedenih projekata bit će sufinansirana iz Budžeta Grada Zenice.

REKONSTRUKCIJU DOMA MLADIH PODRŽALA AMBASADA BUGARSKE

Nakon javnog poziva Federalnog ministarstva prostornog uređenja pod nazivom "Tekući transferi drugim razinama vlasti i fondovima - za projekat utopljanja zgrada radi uštede energije", koji je krajem aprila raspisalo ovo ministarstvo, Gradu Zenici odobrena su sredstva u iznosu od 50.000,00 KM za utopljanje i primjenu mjera energetske efikasnosti na objektu Doma mladih u Zenici. Grad Zenica iz vlastitih sredstava sufinansira aktivnosti za realizaciju ovog projekta.

Dom mladih jedan je od objekata za koji je u sklopu projekta "Izrada detaljnih energetskih pregleda na području Grada Zenica" izrađen pregled energetske efikasnosti. Grad Zenica je aplicirao na javni poziv Bugarske amba-



sade za podršku i sufinansiranje projekta rekonstrukcije Doma mladih, nakon čega su odobrena sredstva u iznosu od 45.580,00 KM.

Nakon završetka radova predviđeno je da se u Dom mladih smjeste šest najaktivnijih

omladinskih uduženja u Zenici. Centar za mlade će imati nekoliko kancelarija, dvije seminarske prostorije i konferencijsku salu.

Zajedničke prostorije ovog centra mladima će biti dostupne besplatno.

RADOVI NA TOPLANI U ZENICI

Nakon što je u martu 2019. godine u kompaniji ArcelorMittal Zenica potpisan ugovor o finansiranju nove Toplane u Zenici, počeli su pripremni građevinski radovi. Toplana, vrijednosti 53 miliona eura, prema tvrdnjama brojnih stručnjaka, riješila bi problem grijanja ovog grada, ali i osigurala bolji okoliš i zdravije okruženje.

Gradska uprava kao suvlasnik, prema riječima Fuada Kasumovića, gradonačelnika Zenice, uključena je u procedure i radove na pripremi gradilišta. ArcelorMittal Zenica imat će 50 procenata, Grad Zenica 20, te druga dva partnera, KPA Unicon i FinnFund po 15 posto udjela u Toplani Zenica.



Osim što je najveći akcionar, s 50 posto udjela u projektu, ArcelorMittal je ujedno i garant kreditnih sredstava od EBRD-a u iznosu od 41 milion eura, kojima se osigurava potpuna realizacija projekta. Toplana

Zenica će, kako se navodi, proizvoditi po najvišim ekološkim standardima, zadovoljavajući EU normama u vezi sa smanjenjem zagađenja. Njen rad je planiran s početkom grijne sezone 2020. godine.



ZENICA PONOVO DOBILA GRADSKU KAFANU

Nakon što je jedan od nekada najreprezentativnijih objekata u Zenici propadao je više od 25 godina, zenička Gradska kafana ponovo je otvorena.

Zahvaljujući aktivnostima Gradske uprave Zenica i gradonačelnika Fuada Kasumovića pokrenuta je ideja da se objektu vrati ugled i stari sjaj. Nakon provedenih zakonskih procedura Gradska kafana u Zenici izdata je u zakup Druš-

tvu za proizvodnju, trgovinu i usluge "LS-Invest" d.o.o. Zenica na period od 15 godina. Radi se o objektu površine 650,65 m² s brojnim sadržajima poput restorana, lounge bara, puba, prodavnice finog peciva, a vrijednost radova je premašila milion i po KM. Prilikom uređenja vodilo se računa da materijali budu moderni i visokokvalitetni. Zakupac će koristiti i dio javne površine trga, na kojem

je, između ostalog, planirano postavljanje ljetne bašte ukupne površine 176 m².

Kada je u pitanju vanjski dio objekta predviđeno je da se dosadašnja fasada zadrži u potpunosti u izvornom stanju, uz njeno čišćenje, uklanjanje grafiti, te saniranje pojedinih dijelova koji nedostaju i armature koja nedostaje. Također, saniran je pločnik površine 900 m², koji se nalazi ispred ulaza u objekat.





IZDAVAČ: Grad Zenica; **PRIPREMA PUBLIKACIJE:** Služba za privredu i upravljanje razvojem i Zenička razvojna agencija ZEDA; **AUTORI TEKSTOVA:** Armin Mujkić, Maida Mujanović, Ajna Dedić, Maša Škrbić; **FOTOGRAFIJE:** Mirza Subašić, Emir Čaplja; **DTP:** Emir Čaplja; **ŠTAMPA:** MeligrafPrint Zenica